

考工典第五十卷

宮殿部紀事一

帝王世紀紂宮九市車行酒馬行炙

左傳昭公八年春石言于晉魏榆晉侯問于師曠曰石何故言對曰作事不時怨譴動于民則有非言之物而言今宮室崇侈民力彫盡怨譴並作莫保其性石言不亦宜乎於是晉侯方築鹿祁之宮叔向曰子野之言君子哉

述異記閭閻構水精宮尤極珍怪皆出自水府

吳王夫差崇飾土木殫耗人力宮妓數千人立春宵宮爲長夜之飲又於宮中作海靈館館娃閣銅溝玉檻宮之楹檻皆珠玉飾之

鴻書齊宣王爲室大蓋百畝堂上三百戶以齊國之大具之三年而未能成羣臣莫敢諫者香居問宣王曰荆王釋先王之禮樂而爲淫樂敢問荆邦爲有主乎王曰爲無主敢問荆邦爲有臣乎王曰爲無臣居曰今王爲大室三年不成羣臣莫敢諫者敢問王爲有臣乎王曰爲無臣香居曰臣請避

矣趨而出王曰香子留何諫寡人之晚也遽召尙書曰書之寡人不肖好爲大室香子止寡人也漢書賈山傳秦起咸陽而西至雍離宮三百鐘鼓帷帳不移而具又爲阿房之殿殿高數十仞東西五里南北千步從車羅騎四馬驚馳旌旗不撓爲宮室之麗至於此使其後世曾不得聚廬而託處焉

原始祕書秦始皇置離宮延曼三百里各宮皆有鐘鼓帷幔美人於其中而不移有經年不識天子者此離宮之始也

史記高祖本紀九年未央宮成高祖大朝諸侯羣臣置酒未央前殿高祖奉玉卮起爲太上皇壽曰始大人常以臣無賴不能治產業不如仲力今某之業所就孰與仲多殿上羣臣皆呼萬歲大笑爲樂

西京雜記趙王如意年幼未能親外傳戚姬使舊趙王內傳趙媼傳之號其室曰養德宮後改爲魚藻宮西京雜記梁孝王好營宮室苑囿之樂作曜華之宮築兔園園中有百靈山山有膚寸石

落猿巖棲龍岫又有鴈池池間有鶴洲臯渚其諸宮觀相連延互數十里奇果異樹瑰禽怪獸畢備

王日與宮人賓客弋釣其中

漢書武帝本紀元封二年六月詔曰甘泉宮內中產芝九莖連葉上帝博臨不異下房賜朕弘休其赦天下賜雲陽都百戶牛酒作芝房之歌

東方朔傳帝姑館陶公主號竇太主堂邑侯陳午尙之午死主寡居年五十餘矣近幸董偃安陵爰叔者爰盜兄子也與偃善謂偃曰足下私侍漢主挾不測之罪將欲安處乎偃懼曰憂之久矣不知所以爰叔曰顧城廟遠無宿宮又有萩竹籍田足下何不白主獻長門園此上所欲也如是上知計出於足下也則安枕而臥長無慘怛之憂久之不然上且請之於足下何如偃頓首曰敬奉教入言之主主立奏書獻之上大說更名竇太主園爲長門宮

原始祕書漢武帝於盤屋縣爲離宮中有五柞樹因名五柞宮

西京雜記五柞宮有五柞樹皆連三抱上枝蔭覆數十畝其宮西有青梧觀觀中有三梧桐樹樹下有石麒麟二枚刊其脇爲文字是秦始皇驪山墓上物也頭高一丈三尺東邊者前左脚折折處有赤如血父老謂其有神皆含血屬筋焉

三輔黃圖北宮在長安城中近桂宮俱在未央北周回十里高帝時制度草創孝武增修之中有前殿廣五十步珠簾玉戶如桂宮

三輔舊事武帝於未央宮起高門武臺殿

列仙傳鉞弋夫人姓趙氏河間人少好酒病臥六年右手鉞卷飲食少望氣者云東北有貴人推而得之見召姿色佳麗武帝反其手得玉鉞而手展有寵生昭帝妊娠十四月上曰聞昔堯十四月而生而鉞弋亦然乃命所生門曰堯母門所居曰鉞弋宮自夫人加婕妤後得罪掖庭獄死及殯香一月昭帝卽位追尊爲皇太后更葬之發六十二萬人起陽陵其棺槨但有彩履

雲陽記鉞弋夫人從至甘泉而卒尸香聞十餘里葬雲陽武帝思之起通陵臺於甘泉宮有一青鳥集臺上往來至宣帝時乃不至

洞冥記武帝起超仙臺於明庭宮北明庭者甘泉別名思趙婕妤起通靈臺於甘泉宮

三輔黃圖萬歲宮武帝造汾陰有萬歲宮宣帝元康四年幸萬歲宮神爵翔集以元康五年爲神爵

紀元

漢書外戚傳趙皇后既立後寵少衰而弟絕幸爲昭儀居昭陽舍其中庭彤朱而殿上髹漆切皆銅沓冒黃金塗白玉階壁帶往往爲黃金釭函藍田璧明珠翠羽飾之自後宮未嘗有焉

西京雜記成帝設雲帳雲幄雲幕於甘泉紫殿世謂三雲殿漢掖庭有月影臺雲光殿九華殿鳴鸞殿開襟閣臨池觀不在簿籍皆繁華窈窕之所棲宿焉 趙飛燕女弟居昭陽殿中庭彤朱而殿

上丹漆砌皆銅沓黃金塗白玉階壁帶往往爲黃金釭含藍田璧明珠翠羽飾之上設九金龍皆銜九子金鈴五色流蘇帶以綠文紫綬金銀花鐻每好風日幡旄光影照耀一殿鈴鐻之聲驚動左右中設木畫屏風文如蜘蛛絲縷玉几玉牀白象牙簾綠熊席席毛長二尺餘人眠而擁毛自蔽望之不能見坐則沒膝其中雜熏諸香一坐此席餘香百日不歇有四玉鎮皆達照無瑕缺窻扉多是綠琉璃亦皆達照毛髮不得藏焉椽桷皆刻作龍蛇縈繞其間麟甲分明見者莫不兢慄匠人丁緩李菊巧爲天下第一締構旣成向其姊子樊延年說之而外人稀知莫能傳者

拾遺記漢成帝好微行於太液池傍起宵遊宮以漆爲柱鋪黑絨之幕器服乘輿皆尙黑色旣悅於暗行憎燈燭之照宮中美御皆服皂衣自班婕妤已下咸帶元纁簪珮雖如錦綉更以木蘭紗綃罩

之至宵遊宮乃秉燭宴幸既罷靜鼓自舞而步不揚塵好夕出遊造飛行殿方一丈如今之輦選羽林之士貢之以趨帝於輦上覺其行快疾聞其中若風雷之聲言其行疾也名曰雲雷宮所幸之宮咸以氈綿藉地惡車轍馬跡之喧雖或於微行昵宴在民無勞無怨每乘輿返駕以愛幸之姬寶衣珍食捨於道傍國人之窮老者皆歌萬歲是以鴻嘉永始之間國富家豐兵戈長戢故劉向谷永指言切諫於是焚宵遊宮及飛行殿罷宴逸之樂所謂從繩則正如轉圜焉 安帝好微行於郊垌或露宿起帷宮皆用錦罽文繡

論衡光武以建平元年十二月甲子生於濟陽宮後殿第二內中室內自明是歲嘉禾生三本一莖九穗長於禾一二尺元帝之初有鳳凰下濟陽故今濟陽宮有鳳凰廬始與李文等俱起遇賊兵走濟陽舊廬見光若火正赤在舊廬道南光耀上屬天

後漢書耿弇傳光武居邯鄲宮晝臥溫明殿弇入造牀下請問注趙王如意之殿也故基在今洛州

邯鄲縣內

東海恭王彊傳初魯恭王好宮室起靈光殿甚壯麗是時猶存故詔彊都魯注恭王名餘景帝之子

殿在兗州曲阜城中其東西二十丈南北十二丈高丈餘

鍾離意傳永平三年夏旱而大起北宮意上疏帝策詔報曰湯引六事咎在一人比上天降旱密雲數會朕戚然慙懼思獲嘉應故分布禱請闕候風雲北祈明堂南設雪場今又敕大匠止作諸宮減省不急詔因謝公卿百僚遂應時澍雨焉

琅邪孝王京傳京都莒好修宮室窮極伎巧殿館壁帶皆飾以金銀京國中有城陽景王祠吏人奉祠神數下言宮中多不便利京上書願徙宮開陽以華蓋南武陽厚丘贛榆五縣易東海之開陽臨沂肅宗許之

皇后紀孝崇皇后宮曰永樂置太僕少府以下皆如長樂宮故事

注

漢官儀曰帝祖母稱長信宮帝

母稱長樂宮故有長信少府長樂少府及職吏皆宦者爲之 孝仁皇后居南宮嘉德殿宮稱永

樂

注

嘉德殿在九龍門內

董卓傳建安元年秋七月帝還至洛陽幸楊安殿張楊以爲己功故因以楊名殿

注

獻帝起居注曰

舊時宮因悉壞倉卒之際撫拾故瓦村木工匠無法度之制所作並無足觀也

吳志孫皓傳注江表傳曰皓營新宮二千石以下皆自入山督攝伐木又破壞諸塋大開園囿陸凱固諫不從

晉書張華傳武帝嘗問漢宮室制度及建章千門萬戶華畫地成圖左右屬目帝甚異之

王隱晉書高堂隆刻鄴宮屋材云後若干年當有天子居此宮惠帝止鄴宮治屋者土剝更泥始見刻字計年正合

玉海元帝時有司嘗奏太極殿廣室施絳帳帝曰漢文以皂囊爲帷遂令冬施青布夏施練帷帳晉書王獻之傳太元中新起太極殿謝安欲使獻之題榜以爲萬代寶而難言以魏韋仲將書凌雲殿榜諷之獻之曰仲將魏之大臣寧有此事注時建太極殿有梅木流以至爲梁因畫花於梁以表瑞

玉海晉朝宴所臨東西二堂而已孝武末年清暑方建宋永初所居唯稱西殿及孝武更造正光玉燭紫極諸殿雕欒綺節珠窗網戶張駿霸西河於姑臧起謙光殿畫以五色飾以金玉窮盡珍

巧四面各起一殿東方曰宜陽青殿南方曰朱陽赤殿西方曰政刑白殿北方曰元武黑殿

獨異志石虎於太武殿前造樓高四十丈以珠爲簾五色玉爲珮每風至卽驚觸似音樂在空過者皆仰視愛之又屑諸異香入粉撒樓上風吹四散謂之芳塵

南齊書王儉傳儉轉左僕射領選如故上壞宋明帝紫極殿以材柱起宣陽門儉與褚淵及叔父僧虔連名上表諫曰臣聞德者身之基儉者德之與春臺將立晉卿秉議北宮肇構漢臣盡規彼二君者或列國常侯或守文中主尙使諫諍在義卽悅況陛下聖哲應期臣等職司隆重敢藉前誥竊乃有心陛下登庸宰物節省之教旣昭龍褒璇極簡約之訓彌遠乾華外構采椽不斲紫極故材爲宣陽門臣等未譬也夫移心疾於股肱非良醫之美畏影迹而馳驚豈靜處之方且又三農在日千畝咸事輟望歲之勤興土木之役非所以宣昭大猷光示遐邇若以門居宮南重陽所屬年月稍久漸就淪胥自可隨宜脩理而合度改作之煩於是乎息所敢謬合請付外施行上手詔酬納宋世外六門設竹籬是年初有發白虎樽者言白門三重門竹籬穿不完上感其言改立都牆儉又諫上答曰吾欲令後世無以加也

南史王曇首傳曇首孫儉爲左僕射初宋明帝紫極殿珠簾綺柱飾以金玉江左所未有高帝欲以

其材起宣陽門儉與褚彥回及叔父僧虔連名表諫上手詔酬納

齊廢帝本紀文惠太子立樓館於鍾山下號曰東田太子屢游幸之東田反語爲顛童也武帝又於青溪立宮號曰舊宮反之窮廡也

齊明帝本紀武帝掖庭中宮殿服御一無所改其儉約如此

南齊書東昏本紀後宮遭火之後更起仙華神仙玉壽諸殿刻畫雕綵青荇金口帶麝香塗壁錦幔珠簾窮極綺麗鑿役工匠自夜達曉猶不副速乃剔取諸寺佛刹殿藻井仙人騎獸以充足之世祖興光樓上施青漆世謂之青樓帝曰武帝不巧何不純用瑠璃

南史梁武帝本紀太清元年幸同泰寺設無遮大會上釋御服服法衣行清淨大捨名曰羯磨以五明殿爲房設素木牀葛帳土瓦器乘小輿私人執役乘輿服法一皆屏除

陳后妃列傳舊顯陽昭陽二殿太后皇后所居也永明中無太后皇后羊貴嬪居昭陽殿西范貴妃

居昭陽殿東寵姬荀昭華居鳳華柏殿宮內御所居壽昌畫殿南閣置白鸞鼓吹二部乾光殿東西

頭置鐘磬兩箱皆宴樂處也上數遊幸諸苑囿載宮人從

一作從車置宮

內深隱不聞端門鼓漏

聲置鐘於景陽樓上應五鼓及三鼓宮人聞鐘聲早起莊飾

南部煙花記陳後主爲張貴妃麗華造桂宮於光照殿後作圓門如月障以水晶後庭設素粉罽毼庭中空洞無他物惟植一桂樹樹下置藥杵曰使麗華恆馴一白兔麗華被素袿裳梳凌雲髻插白通草蘇孕子輟玉華飛頭履時獨步於中謂之月宮帝每入宴樂呼麗華爲張嫦娥

魏書公孫表傳表子軌軌子叡字文叔初爲東宮吏稍遷儀曹長賜爵陽平公時顯祖於苑內立殿勅中祕羣官制名叡曰臣聞至尊至貴莫崇於帝王天人挹損莫大於謙光伏惟陛下躬唐虞之德存道頤神逍遙物外宮居之名當協叡旨臣愚以爲宜曰崇光奏可

高祖本紀太和十七年幸洛陽周巡故宮基址帝顧謂侍臣曰晉德不修早傾宗祀荒毀至此用傷朕懷遂詠黍離之詩爲之流涕

玉海後魏孝文南征還洛引見王公侍臣於清徽堂帝曰此堂成來未與王公行宴樂之禮今與諸賢欲無高而不升無小而不入因之流化渠洗煩池帝曰此池有嘉魚任城王澄曰所謂魚在在藻有頌其首帝曰且言王在靈沼於物魚躍次之觀德殿帝曰射以觀德故以命之次之凝閑堂帝曰

此堂取天子閑居之義不可縱奢以忘儉自安以忘危故於堂後作茅茨堂謂李冲曰此東曰步元
廡西曰游凱廡此座雖無堯舜之君卿當無媿元凱又曰光景垂落朕同宗有載攷之義卿等將出
何得默爾德音卽命黃門侍郎崔光郭祚通直郎邢巒崔休等賦詩見燭至公卿辭退冲再拜上千
萬歲壽帝曰卿等以燭至致辭復獻萬壽朕報卿以南山之詩乃曰燭至辭退庶姪之禮在夜載攷
宗族之義卿等且還朕與諸王宗室欲成此夜飲又詔延四廟之子下逮元孫之胄申宗宴於皇信
堂令宗室賦詩又會百寮於宣極堂行飲至策勳之禮

伽藍記建春門內御道南有句盾典農籍田三署籍田南有司農寺御道北有空地擬作東宮晉中
朝時太倉處也太倉南有翟泉周迴三里卽春秋所謂王子虎晉狐偃盟於翟泉也水猶澄清洞底
明靜鱗甲潛泳辨其魚鼈高祖於泉北置河南尹晉中朝時步廣里也泉西有華林園高祖以泉在
園東因名蒼龍海華林園中有大海卽漢天淵池池中猶有文帝九華臺高祖於臺上造清涼殿世
宗在海內作蓬萊山山上有仙人館山有釣臺殿並作虹蜺閣乘虛來往至於三月禊日季秋良辰
皇帝駕龍舟鷁首遊於其山海西有藏冰室六月出冰以給百官海西南有景山殿東有義和嶺嶺

上有溫風室山西有姮娥峰峰上有寒露館並飛閣相通凌山跨谷山北有元武池山南有清暑殿殿東有臨澗亭殿西有臨危臺景陽觀山南有百果園果列作林林各有堂有仙人棗長五寸把之兩頭俱出核細如鍼霜降乃熟食之甚美俗傳云出崑崙山一曰西王母棗又有仙人桃其色赤表裏照徹得巖霜乃熟亦出崑崙山一曰王母桃也奈林南有石碑一所魏明帝所立也題曰苗茨之碑高祖於碑北作苗茨堂永安中年莊帝馬射於華林園百官皆來讀碑疑苗字誤國子博士李同軌曰魏明英才世稱三祖公幹仲宣爲其羽翼但未知本意如何不得言誤也銜之時爲奉朝請因卽曰以蒿覆之故言苗茨何誤之有衆咸稱善以爲得其旨歸奈林西有都堂有流觴池堂東有扶桑海凡此諸海皆有石竇流於地下西通穀水東連陽渠亦與翟泉相連若旱魃爲害穀水注之不竭離畢滂潤陽穀泄之不盈至於鱗甲異品羽毛殊類濯波浮浪如出自然也

水經注余以太和十八年從高祖北巡屆於陰山之講武臺臺之東有高祖講武碑碑文是中書郎高聰之辭也自臺西出南上山山無樹木惟童阜耳卽廣德殿所在也其殿四柱兩厦堂宇綺拱圖畫奇禽異獸之象殿之西北便得焜煌堂雕楹鏤桷取狀古之溫室也其時帝幸龍荒遊鸞朔北南

秦王仇池楊難當捨蕃委誠重譯拜闕陛見之所也魏太平眞君三年刻石樹碑勒宣時事碑頌云肅清帝道振攝四荒有蠻有戎自彼氏羌無思不服重譯稽顙恂恂南秦斂斂推亡峨峨廣德奕奕焜煌侍中司徒東郡公崔浩之辭也碑陰題宣城公李孝伯尙書盧遐等從臣姓名若新鏤焉

北齊書馮子琮傳世祖禪位後主世祖御正殿謂子琮曰少君左右宜得正人以卿心存正直今以後事相委除給事黃門侍郎領主衣都統世祖在晉陽旣居舊殿少帝未有別所詔子琮監造大明宮宮成世祖親自巡幸怪其不甚宏麗子琮對曰至尊幼年纂承大業欲令敦行節儉以示萬邦兼此北連天闕不宜過復崇峻世祖稱善

幼主本紀幼主宮掖婢皆封郡君宮女寶衣玉食者五百餘人一裙直萬匹鏡臺直千金競爲變巧朝衣夕敝承武成之奢麗以爲帝王當然乃更增益宮苑造偃武修文臺其嬪嬙諸宮中起鏡殿寶殿璚瑁殿丹青彫刻妙極當時又於晉陽起十二院壯麗逾於鄴下所愛不恆數毀而又復夜則以火照作寒則以湯爲泥百工困窮無時休息

周書武帝本紀帝平鄴詔曰僞齊叛渙竊有漳濱世縱淫風事窮彫飾或穿池運石爲山學海或層

臺累構概日凌雲以暴亂之心極奢侈之事有一於此未或弗亡朕非貪薄衣以弘風教追念生民之費尙想力役之勞方當易茲弊俗率歸節儉其東山南園及三臺竝可撤毀瓦木諸物凡入用者盡賜下民 帝身衣布袍寢布被無金玉之飾諸宮殿華綺者皆撤毀之改爲土階數尺不施櫺棋其雕文刻鏤錦繡纂組一皆禁斷

宣帝本紀帝所居宮殿帷帳皆飾以金玉珠寶光華炫燿極麗窮奢及營洛陽宮雖未成畢其規模壯麗踰於漢魏遠矣唯自尊崇無所顧憚國典朝儀率情變改後宮位號莫能詳錄每對臣下自稱爲天以五色土塗所御天德殿各隨方色

南部烟花記隋煬帝觀文殿前兩廂爲堂各十二間堂中每間十二寶廚前設五方香牀綴貼金玉珠翠每駕至則宮中擎香爐在輦前行

隋書宇文愷傳上北巡愷造觀風行殿上容侍衛者數百人離合爲之下施輪軸推移倏忽若有神功

大業雜記十年總公東進幸北平榆林宮四月車駕幸汾陽宮避暑宮地卽汾河之源上有名山管

汾高可千仞帝於江山造亭子十二所其最上名翠微亭次觀風彩霞臨月飛芳積翠合璧含暉凝碧紫富澄景最下名尚陽亭亭子內皆縱廣二丈四邊安劍闌每亭鋪六尺楊子各一山下又有臨汾殿勅從官縱觀

銷夏隋秦王俊爲水殿香塗粉壁玉砌金階梁柱楣棟之間周以明鏡間以寶珠極瑩飾之美每與賓客伎女絃歌於其上

唐書蘇世長傳世長拜諫議大夫侍宴披香殿酒酣進曰此煬帝作邪何雕麗底此帝曰卿好諫似直然詐也豈不知此殿我所營乃詭云煬帝邪對曰臣但見傾宮鹿臺非受命聖人所爲者陛下武功舊第纔蔽風雨時以爲足今天下厭隋之侈以歸有道陛下宜刈奢淫復朴素今乃卽其宮加雕飾焉欲易其亂得乎帝咨重其言

張元素傳元素遷給事中貞觀四年詔發卒治洛陽宮乾陽殿且東幸元素上書曰臣惟秦始皇帝藉周之餘夷六國統壹尊將貽之萬世及子而亡者殫嗜奔欲以逆天害人也天下不可以力勝唯當務儉約薄賦斂以身先之乃能大安今東都未有幸期前事土木戚王出藩又當營構科調繁仍